

EKIALDE HURBILA. Al Aksa Martirien Brigadako ekintzaileek bi israeldar hil eta beste bat zauritu dute, tiroz

PANek FPLPko burua atxilotu du Rehavam Zeeviren hilketagatik

Israelek Turismo ministroa zenaren aurkako atentatua antolatu izana leporatzen dio

Erredakzioa | DONOSTIA

Ahmat Saadat FPLP Palestinarren Askapenerako Herri Fronteko burua atxilotu zuen atzo Palestinako Poliziak Ramalan, Rehavam Zeevi Israelgo Turismo ministro zenaren hilketari antolatu izana leporatuta. Bestalde, bi aldeek iragan abenduaren 16an itundutako su-etena indarrean mantentzen zaren alde agertu ziren atzo Jasser Arafat Palestinako Aginte Nazionalako burua eta Shimon Peres Israelgo Atzerri ministroa. Kanean, baina, mendeku oihuak egin zituzten palestinarrek, eta Israelgo Armadak alerta egotzera ezarri zuen.

Bake prozesuari heltzeko

su-etena indarrean mantentzea ezinbestekoa dela adierazi zuen atzo Jasser Arafatek. «Al Fata taldearen eta Tanzim miliziaren erabaki ofiziala» dela zehaztu zuen gero Husein al Shejek, Al Fatako Zisjordaniarako ordezkariak, eta azken egunetako hilketek ez dutela su-etena hautsi zehaztu zuen.

Hala ere, herenegun Tulkaremen hildako Raed al Karmi Al Fatako buruaren hiletetan izan zirenek mendekua eskatu zuten. Milaka lagun atera ziren kalera Tulkaremen Al Fatako buruzagi zenaren gorpuaren atzetik, eta israeldarren kontrako oihu ugari egin zituzten.

Binyamin Ben Eliezer Israelgo Defensa ministroak, bestal-



JAAFAH ASHTIV / APPI

Raed al Karmiren hiletetan parte hartu zutenek armak jaso eta mendekua eskatu zuten.

de, Al Karminen heriotza «lan istripu batek» eragin zuela berretsi zuen atzo. Horren harira, Israelek indarkeria sustatzeko asmorik ez duela nabarmendu zuen Peresek.

Israelgo Armadak segurtasun neurriak indartzeko agindu zuen atzo, palestinarren mendekuaren beldur. Samarian —Zisjordanian iparraldean—, esaterako, kontrol zorrotzak jarri zituen Israelgo Armadak.

Dena den, Raed al Karmiren hilketak ekar ditzakeen ondorioez beldur ez zela adierazi zuen Ben Eliezerrek. Haren ustez, «palestinarrek mendekatzera deitu arren, Al Karmiren heriotza ez da intifada suspertzeko aitzakia izango».

Al Aksa Martirien Brigadaren erantzuna

Herenegungo hilketari horri, baina, erantzun azkarra eman

zion atzo Al Aksako Martirien Brigadak —Al Fata taldearekin lotuta dago erakundea—. Izan ere, bi israeldar hil eta soldadu bat zauritu zuten atzo Al Aksakoek, tiroz, Beit Sajurren —Belengo barrutian dago—. Al Aksako Martirien Brigadak Beit Jalan bahitu zuen hildako gizonetako bat eta Beit Sajurren hil, erakunde horrek Zisjordanian zabalduetako idatziak dioenaren arabera.

ARGENTINA. Mercosur indartu eta Europako Batasunarekin eta Estatu Batuekin harremanak hobetu nahia ditu Gobernuak

Erredakzioa | DONOSTIA

«Kaos eta gerra zibil arriskua egon arren», egoera horri aurre egiteko gai dela adierazi zuen atzo Eduardo Duhalde Argentinako presidentek. «Herrialde normal bat eraiki nahi dugu, nahiz lan zailaren itxura izan horrek», nabarmendu zuen Duhaldek atzo, hainbat sektoretako ordezkariekin izandako lehen bileraren ostean.

«Egoera honi buelta emateko gai naizela uste dut, itxura txarra badu ere», adierazi zuen Duhaldek. Irtenbidea «boterea sortzean» datzala esan zuen Duhaldek, eta horretarako alderdiak bateratu eta «zorrotasunez» jokatu beharra dagoela gaineratu zuen.

«Ontzia hondoratzen ari zaigu, baina ez matxura handi bat duelako, guztiz zulatuta dagoelako baizik», gehitu zuen Duhaldek. Haren hitzetan, «Argentina anarkiatik, kaotetik eta odol putzu handi batetik gertu dago». Hala ere, pauso bat beharago ez egiteko giltza duela zehaztu zuen Duhaldek.

Duhaldek esan du «gerra zibila» izateko arriskua dagoela, baina egoerari aurre egiteko gai dela



NAHO / EPA

Estanislao Karlic Eliza Katolikoko ordezkaria eta Duhalde, atzo, Buenos Airesen egindako bileran.

Gobernuaren zeregin handiena Argentinako pobrezia-ekin amaitzea dela esan zuen presidentek. Horren harira, hau gehitu zuen: «Ez gara bankuen interesak defendatzen

ari, herritarren aurrezkiak babesten baizik». Dena den, bankuak ere oso egoera larrian direla azpimarratu zuen. Corralito-aren inguruan, berriz, Gobernuak «arinki» eta «ardu-

ragabe» jokatzeko asmorik ez duela jakinarazi zuen presidentek, milioika pertsonaren aurrezkiak jokoan daudela arrazoituta.

Bestalde, Argentinak «mota

orotako laguntza» behar duela adierazi zuen presidentek, eta NDF Nazioarteko Diru Funtzak laguntza eskainiko dion itxaropena agertu zuen. Horren harira hau esan zuen: «Badakit Argentinari ez diotela larri sinesten, orain arte agindutakoak ez dituelako bete izan, eta beti diru eske joan izan delako, baina NDFk lagunduko digu».

Mercosur indartzeko nahia

Mercosur Hegoaldeko Merkatu Bateratua indartu —Argentinak, Brasilek, Paraguai, Uruguai, Boliviak eta Txilek osatzen dute— eta Europako Batasunarekin eta Ameriketako Estatu Batuekin harremanak hobetzea du helburu Argentinako Gobernuak. «Mercosur garatu behar dugu. Gure herrialdeentzat ezinbestekoa da desoreka makroekonomikoak alde batera utzi eta aurrera egiten jarraitzea», esan zuen Duhaldek.

Bestalde, 100.000 dolar baino gehiagoko zorrak dolarren balio finkoaren arabera kitatu ahal izango direla jakinarazi zuen atzo Gobernuak.